

Augsburg, 25. März 1557

An Johannes Oporinus

UB Basel, Fr. Gr. I 11, fol. 209r.

Steinmann Nr. 701.

Lit.: Husner S. 151.

S. P. D. Accipies a Samuele Willeri famulo semissem ferè Choniatae vnà cum literis meis, ad quas te quamprimum respondere velim. Si quid pecuniae huc missurus es, de quo te dominus meus admoneri per me iussit (ego verò, si mei iuris essem, alia iucundiora ad te scribere mallem) fortasse per Georgium Willerum, aut alium mercatorem commutatione quapiam id facere pro tua prudentia melius et cautius poteris, quam ego tibi praescribere. Misi de industria catalogos magnorum voluminum ad Birckmannum, vt ea ratione tuis rationibus simul et illius consuleretur. Sed vereor, vt ij libri in promptu nunc sint, et Arnoldo nostro tantum vacet. Scio vobis expeditius esse libris soluere quam pecunia. et dominus meus libros quam pecuniam mallet, si modò vos haberetis eos, quibus eius Bibliotheca caret. Si verò libraria ista ratio non successerit, ad pecuniariam rationem erit descendendum. quam etsi facile credo perdifficilem tibi esse, tamen videndum erit, ne Domini animus propter longiorem moram abs te alienetur. Superioribus nondinis te a procuratore suo Stegmanno appellari uoluit, si vlrò pecuniam non dedisses. Nunc verò mihi mandauit, vt, quoniam mea intercessione maxima pecuniae pars tibi credita sit, operam quoque dem, vt restituatur. Quod te, cum vtriusque nostrum intersit, sedulo curaturum confido. Sin eae difficultates tuae fuerint (quod absit) vt non possis omnia nunc soluere, consultum puto, vt ipse per literas dominum roges, vt moram aequiore animo ferat. Vale et de Choniate caeterisqüe rebus quamprimum rescribito. Augustae Vindelicorum 8 Cal[endas] Aprilis Anno 1557.

Hiero[nymus] Wolfius  
Tuus.